

no. 5  
L E T T R E

D E

M O N S I E V R

L E C O M T E D E

S A I N C T P A V L,

A M O N S I E V R L E

*Prince de Condé.*



A P A R I S,

Par JEAN BOVRIQVANT, au mont  
S. Hilaire, près le puits Certain, au  
Lys fleurissant.

---

M. DC. XV.

*Avec Permission.*

*[The text on this page is extremely faint and illegible due to fading or bleed-through from the reverse side. It appears to be a continuous block of text, possibly a letter or a page from a manuscript.]*

---

**LETTRE DE MONSIEVR**

*le Comte de saint Paul à Monsieur  
le Prince de Condé.*

**M**ONSIEVR,  
Tandis que i'ay recogneu  
que vostre mescontentement &  
vostre esloignement de la Cour  
auoit pour fondement le bien de  
la France, ie me suis joint avec vous  
de vœux & de volonté, pour tes-  
moigner que ie n'estois moins bô  
François qu'aucun autre, & que ie  
ne respirois que le repos & la tran-  
quillité du Royaume. Mais à pre-  
sent que ie vois qu'au lieu d'ap-  
porter quelque remede aux desor-  
dres que vous disiez pulluler par-  
my les offices depuis la mort du  
feu Roy, vous avez commencé de  
vous emparer de quelque ville, cō-



me depuis peu de iours en çà de  
Chasteau-Thierry, sur les habitans  
de laquelle (à ce qu'on m'a fait as-  
sauer) vous auez exigé douze  
mille escus, & mesme en auez prins  
& emmené quelques vns des prin-  
cipaux de la ville en la ville de Soif-  
sons, iusques à ce que ceste somme  
vous ait esté deliurée: en quoy (ou-  
tre l'interest de sa Majesté) il y va du  
mien particulier: cela me fait croi-  
re que vostre dessein est tout autre  
que ie ne m'estois imaginé. C'est  
pourquoy i'ay creu que mô deuoir  
m'obligeoit a vous tracer ces lignes  
pour vo' aduertir que ceste façõ de  
remedier aux desordres qui pour-  
roient estre en l'Estat, ne pourra ia-  
mais estre approuuée d'aucun bon  
seruiteur de Roy, veu qu'elle sèble  
ne tendre qu'à vne entiere rebel-  
lion contre sa Majesté, & vne rui-

ne de son estat: chose à laquelle,  
comme premier Prince du sang,  
vous auez plus d'intérêt qu'aucun  
autre des Princes qui vous suivent  
en ceste procedure; & devez penser  
d'y apporter autre remede, si vous  
ne voulez encourir le blafme de  
tous les bôs & fideles seruiteurs de  
sa Majesté. Pour mon particulier, ie  
vous diray qu'il n'y a chose qui me  
soit plus chere que ma parole vne  
fois donnée à gens d'honneur, (&  
notamment de vostre qualité) ce  
neantmoins ie vous prieray de  
m'excuser, si en cela ie ne vous puis  
tesmoigner les effects de mes pro-  
messes, qui estoient de vous assister  
de tout ce qui seroit en mon pou-  
voir: Car ce me seroit vne lascheté  
fort grande de quitter l'honneur  
& le seruice du Roy mon bon mai-  
stre, à present, que ie voy qu'il a be-



soing de ma fidelité, mon secours  
 & seruice. Aussi veux-je bien qu'on  
 sçache qu'à toute heure ie seray  
 prompt de mettre à execution les  
 commandemens desquels il luy  
 plaira m'honorer, & desirerois fort  
 que tous les sujets en ayent la mes-  
 me volonté, afin qu'à l'aduenir au-  
 cun d'eux ne soit contrainct pour  
 ne l'auoir assisté quand il en estoit  
 de besoing, d'en venir à vn repen-  
 tir, qui en faict de guerre ne doit  
 estre receu pour argët de bon aloy.  
 Je ne doute point, M O N S I E V R,  
 que vous ne trouuiez estrange ce  
 mien subit changement à vostre  
 ayde & secours: Mais si vous con-  
 siderez à part vous, qu'il n'y a pa-  
 ction ny consideration quelcôque  
 qui puisse exempter de blasme le  
 subject, qui recognoissant auoir  
 promis chose preiudiciable à son

Prince souuerain, ne veut, ny ne  
doit l'effectuer, vous excuserez ce-  
luy, qui (sauf l'interest & le seruice  
de son Roy) voudroit vous tes-  
moigner qu'il est,

MONSIEVR,

Vostre tres-fidele amy  
D. S P.

De Niort ce 6.  
Octobre 1615.

Je vous prie de m'excuser  
pour l'absence de votre  
lettre du 10. J'ai été  
si occupé par les affaires  
de la maison que je n'ai  
pu vous répondre plus  
tôt.

Monsieur,

Votre très humble  
serviteur  
D. P.

De Monsieur  
Olivier